



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 9. Kalenderwoche – ab 28. Februar 2010

# Endwenden

Ährlich, isch hab friehor gedachd, dasses die gahr nisch mähr gähm dud, die ganzn Adlischn un Brinz un Grafn un so. Das heeßd, gedachd hab isch eischendlich gahr nischd iebor die, die ham eenfach keene Rolle geschield. Endmachded! Ausgerodded!

Glar, habsch ooch gewussd, dasses noch de Gwiehn gähm dud in England odor dähn Graf Lambsdorf... abor dann is ooch schon Schluß gewähsn. Dass die heidzudaache Woche fiehr Woche ganze Zeidung filln dun mid ihre Schgandahl- un Liebesgeschischdn un mid Affährn un so... nee, das begreif isch eischendlich nisch. Mir dud das so vorkomm, als wie wenn die ganzn Adlischn sisch Jahrzähnde lang wie so Wirmor dief in dor Ährde vorbuddld haddn un nu widdor hochgekomm sinn ans Daacheslischd. Erschd driehm im Wesdn - un dann nach dor Wende sinnse ooch Schdigg fiehr Schdigg widdor gen Osdn vorgeriggd.

Gen Osdn, das is ja schon immor eene bevorzuchde Rischdung von deudsche Adlische gewähsn.

Jезде hamor ja sogahr widdor so een Adlischn als Krieschsminisdor - dähn von un zu Guddnbersch! Abor vorleifisch had dähr sisch noch nisch direggd nach Osdn orjendierd - dähr is mid Afghanisdahn voll ausgeladed. Nee, da ham de Boln un de Russn momendan Gligg!

Un viele Adlische wolln nu das widdor zurigg ham, was se ma gehabbd ham - Ländoreien, Schlössor, Schmugg, Bildor, Silborgeschirr, Goldnachddöbbe un... un... un!

Un viele hamm ooch werglich was zurigg gegrishd! Nisch alle, aber warum un wesweeschn mansche doch...? Un mansche nisch? Keene Ahnung.

Abor erschd kirzlich had eene Adlische widdor einische wärdvolle Gundschedigge zurigg gegrischd. Aus Schloß Moridzbursch un aus Dräsdn... bloß de Gundsammlung in Gemnidz soll sisich gwähr geleschd hamm. Die had nischd rausgeriggd!

Also, wie findsch denne das? Wenn da werglich was rumschdehn dud in Gemnidz, was dähr Adlischn geheern dud, dann muss das doch hährgegähm wern! Ohne zöschorn!

Wo dun mir denne sonsd hinkomm, wenn mir alle Vorbreschor, die ibor de Jahrhunnorde een Reischduhm zusammgeraffd hamm, wenn mir dähnen ihrn Reischduhm nisch zuschbreschn dun? Was du geerbd hasd von deinen vorblischenen Vorfahrn - un wenss ehm noch solsche Gaunor un Vorbreschor gewähnsinn - das dud dir geheern! Das is vorbriefdes Reschd! Un wenn dir was endwended wordn is, dann mussd du das zurigg grischn, wenss noch da is!

Ja, hier grischd ja dor Begriff endwenden, een ganz neun Inhalt! Vor dor Wende hamm mir hier im Osdn dähm Adl endwended, was mor endwenden konndn. Jedzd nach dor Wende wolln die Adlischn das nu widdor selbor vorwenden. Damidses schēen ham off ihre Burgn un Schlessor! Das kammor doch vorschdehn! Die brauchn een gewissn Lugsus!

Eischendlich schade, dass mir de Bodnreform nisch rigggängisch machn kenn.

**Eduard Sachsenmeyer**